

## “Guánt da feste”

L’*“vademecum”* per se vesti polito l guánt da fodoma

**Cultura** - Aldidancuoi ogni machina o aparat elettrico che se compra l a suo liber de le istruzion. Se no se le abada polito l no va o peso se podèssa se fé ence mel. Ence n guánt tradizional, coche po ester chël da fodoma, l va vesti e porté coche toca. Nviade ste mëde le ie tigniva scialdi. Le abadèva che ogni particolar l siebe nte sua luoga: l fazolèt l ava da ester bel fat su e ciolé ju dedavò bel ntaimez, l gurmel no l ava da avei le faude, le manie i ava da ester bele fate ite a comedon e l nastro bel dèrt da le ciolé ite. E coscita nnavánt. Ma nopa per la blaga che l é aldidancuoi de fe vedei, magari, che s’a n guánt nuof “da boutique”. Zerto, forsci l eva ence l sol che i ava e nlouta i lo tigniva polito percièche l ava da duré n pez. Ma se se ciala chelche vegla foto, mper de lieje nte chi visc sgiavei dal temp e da le fadie, ence na gran dignité e gusto per se fe vedei con suo bel guánt. Per chëst mper de ntène che l porté polito l eva, tra l auter, n senn de respet per l guánt. Na tradizion che vigniva portata nnavánt generazion davò generazion. Ncuoi l guánt l ven porté demé da le gran feste o n ocajion de sfilade. Ste vegle mëde che l vestiva ncora ogni di e che spò le savèva da se l mëte a ogli sarei i é drio a morì fora. Coscita tres plu da spëss se veiga l guánt da fodoma vesti su de ogni viers. Da na pert l é da aprezé la vèja e la voia de l porté. Ma da l’altra no se po se desmentié che l é na tradizion da respeté e che no se po proprio fe cochemei. Coscita, davò n toch se pensáva su e che se dijéva, l Union dei Ladins da Fodom l’a metù auna l pico liber “Guánt da feste”. Na sort de vademecum de coche s’a da se vesti e porté l guánt da fodoma. L’idea l’é piada via da la prescidente onoraria Bruna Grones “Ioscia” che l’a cialé soura ence a dut l laour. Coscita s’é jus a se cheri chèle mëde che ncora sa polito o se recorda coche l jiva metù l fazolèt, i corei, l cernègle nte ciavei co l mesalana e coscita nnavánt. Nte chëst a daidé pro trop la Ida de Simon, che sta fora n Gherdëna. Una a la spiegazion l é ence i desens da



*La quartela del liber de fora da l’Union dei Ladins da Fodom.*

podei cialé per capì meo, fac dal Davide “Tusc” e da la Isabella Marchione. Nel liber se nsegna a vesti i trei guánt tradizional: l mesalana, che l é chël plu vegle, l guánt da fodoma nasciù davò la Pruma Viera e chël “n manie blance”. Le descrizion i é menude ma sauride da capi. L liber l é bel pico, l sta ulachemei e se fesc mprescia al tre fora e i é de n’oglada se ven n dubio. Scrif Bruna Ioscia e la prescidente de l’Ulf Manuela Ladurner nte la prefazion: Pro na gran festa auda n bel guánt: po’ ester che l tofe da naftalina, ma se l tolon fora de almierch l di davánt e l meton a svamporé, l é de segur l guánt adato per l’ocajion. Nost guánt ncandenò l à riscé de ester desmentié e de jì perdù auna a noste feste che davò l’altra le se n jiva davò breia ju. Ma grazie a l’Ulf, al Benigno “Gobo” e al Grop da Bal che i à descedé nte la jent l amour per suo guánt e sue tradizion, on l muot de se l vesti ncora ncuoi. Con chëst pico liber on pensé de ve dé na mán a ve l vesti polito, che l no vegne “trat dintourn co la fourcia” o che l stiebe “come la nei sui mugli” ( dit da nzacan ). Chël che l’Union se augura spò, l é che sto liber l feje vignì o tourné la voia e l gaist de se vesti l guánt da fodoma. E coche a dit valgugn: “Se vesti dèrt l é polito, se vesti polito l é dèrt.” (ls)